

Հայ գրականության հանրապետական օլիմպիադայի

Հարցաշարերի պատասխաններ

X դասարան

1. Գրիգոր Նարեկացին մեր գրականության ամենաբարձր թռիչքներից է, որ սովորեցնում է «տառապանքով ինքն իրեն գտելու, ինքն իրենից բարձրանալու, ոգու և խղճի ամենաբարձր ոլորտներին առնչվելու» դժվարին արվեստը: Նարեկա մեծ ճգնավորը իր տիեզերական հանճարով բացահայտեց հայ ժողովրդի հարատևության գաղտնիքը:

Նա դարձավ Հայաստանի վերածնության հզոր փողհարը, համարձակորեն ճեղքեց խավարը՝ լուսավորելով ամեն ինչ ու ամենքին:

Նարեկացին առաջինն էր, որ հայ բանաստեղծությունը մոտեցրեց իրական կյանքին, թեև այլաբանորեն, սակայն պատկերեց բնության անսպառ հրաշքներն ու մարդուն՝ իբրև Աստծո ստեղծած էակի, գովերգեց կնոջ գեղեցկությունը՝ Աստվածամոր կերպարով: «Մեղեդի ծննդյան» տաղում նա, հանձին Աստվածամոր, գովերգում է կենսալից, թրթռուն . «այգաբացի լուսացնցող շող» հիշեցնող կնոջը, որի «այտերից դափնեվարդի ու նռնենու ծաղկաթերթեր են թափվում», որի «գեղաշիտակ իրանից սիրտն էր կարկաչում հուզավարար կենսատու սեր», որի ծով աչքերում արեգակներ են փայլում: Սա անմնացորդ սիրո ու հարատև գեղեցկության օրհներգ է, և այս երգը երգում է մեկը, ով երբեք չճաշակեց սիրո վայելքը: Այս կնոջ քայլերից «շող է կաթում», նա «քայլում է մարգարտաշար», և մենք Մարիամ Աստվածածնի մաքրամաքուր սիրո մեջ տեսնում ենք իրական կնոջը՝ իր ողջ հմայքով, իր «թիկնեթեկին» հպարտ քայլվածքով՝ քաջատեղյակ իր գեղեցկությանն ու հմայքին: Այլաբանությունը կարծես իր տեղը դիջում է գեղեցիկ իրականությանը, որ շնչում է սիրով ու գեղեցկությամբ: Շրջասույթներ՝ Մեծ աղոթասաց, անհասանելի հորիզոն, ճշմարտության վարդապետ, շնչական մատյան:

2. Կոմս Էմմանուելը Միքայել Նալբանդյանն է՝ ազատության երգիչը: Կոմս Էմմանուելը «Մեռելահարցուկ» վեպի գլխավոր հերոսն է, որը ակտիվ, գործունյա, անհաշտ բնավորություն է: Կոմս Էմմանուել-Նալբանդյանը իր կյանքի իմաստը պայքարի մեջ է գտնում, համարձակորեն ձաղկում է հոգևոր դասին ու բուրժուական հարաբերությունների անմարդկային էությունը: Վեպը լոյս է տեսել «Հյուսիսափայլ» ամսագրում, 1859-ին: Հետագայում Նալբանդյանը գրում է իր նշանավոր «Հիշատակարանը», որը հիմք դրեց գեղարվեստական հրապարակախոսությանը: «Կոմս Էմմանուելի հիշատակարանը» գեղարվեստական հրապարակախոսության անուրանալի նվաճումներից է և մշտաճանաչ ու մշտամնա արժեքներից:

Նալբանդյանը մեծ հեղափոխական է, ժողովրդավար ու ժողովրդասեր, նրա կյանքը համակ հրդեհ էր, որտեղ այրվում էին ժամանակի բոլոր հրատապ խնդիրները. նա առաջիններից էր, որ համարձակորեն փաստեց, որ ժողովրդի հետամնացության ու թշվառության ամենամեծ պատճառը տգիտությունն է և հաստատեց, որ աղքատության, ստրկության մեջ չկա և չի կարող լինել լուսավորություն: Շրջասույթը՝ Ազատության երգիչ, մնացյալը՝ մասնակիցը:

3. Սկյուտարի սոխակը վաղամեռիկ հանճար Պետրոս Դուրյանն է, որին Պարույր Մևակն անվանել է «Մեր քնարերգության Վահագնը»: «Պետրոս Դուրյան՝...սա աշխարհ չպատկերեց: Եվ աշխարհ չստեղծեց: Մա բացեց իր աշխարհը, որ իրենից հետո կոչվեց ու կոչվելու է իր իսկ անունով՝ Դուրյանական»:

Պետրոս Դուրյանի աշխարհում «Լճակ» կա, կա «բույլ մը նայվածք», «փունջ մը ժպիտ», «դժոխք մ'անեծք», «գիշեր մը սուգ»: Կա նաև հրաժեշտի ցավ ու զայրույթ, և կա աղաղակ ու աղերս՝ «Օ՛հ, կայծ տվեք ինձ կայծ, Կայծ տվեք ապրիմ...»:

Մակայն դաժան էր ճակատագիրը. անողորմ հյուծախտը՝ բանաստեղծական կոչվող հիվանդությունը, սողոսկել էր նրա մարմինը և հյուծում էր անխնա: 20-ամյա պատանին սեր չճաշակեց, գրական ճանաչում չունեցավ, տպագրված չտեսավ իր հրաշալի բանաստեղծությունները, բայց մինչև մրուրը ճաշակեց հուսահատության ու մենության դառնությունը: Բերված տողը Դուրյանի «Տրտունջ» բանաստեղծությունից է, որը նա գրել է մահվան մահճում՝ մահից երկու օր առաջ: Նա համարձակորեն «Ելավ աստղերու սանդուղքն անալի(աստիճան չունեցող)», դարձավ այն անմարելի աստղը, որ արդեն մեկուկես դար ժպտում է մեզ: Իսկ որ Դուրյանը զայրույթով պոռթկալու ամեն իրավունքն ուներ, միանգամայն ընդունելի ու հասկանալի է: Այս բանաստեղծության մեջ ընթերցողը զգում է բանաստեղծի հոգու ալեկոծումը, տառապանքը, մահվան սպառնալիքը և կյանքի ծարավը: Մա փշրված սրտի վերջին ճիչն է, որ պոռթկում է առ Աստված: Այն «փրփրում մը դժոխքի նման» հրաբխային ժայթքում է, որ անեծք է դառնում, որովհետև Աստված չի «տեսնում» բանաստեղծի տառապանքը, անողորմ է Աստված, և Դուրյանը ըմբոստանում է նրա դեմ՝ «Աստծո ծաղրն է աշխարհ ալ արդեն»:

4.«Հայաստանի վերքի երգիչ»-ը՝ լուսապայծառ Աբովյանը, իր գլուխգործոցը տպագրված չտեսավ. այն լույս տեսավ նրա ողբերգական կորստից 10-տարի հետո և հրդեհեց ընթերցասեր հանրության սրտերն ու հոգին: Ինչպես հեղինակն էր «Էրվում, խորովվում»՝ տեսնելով հայ մանկան անտարբերությունը հայոց պատմության, հայ գրականության նկատմամբ, այնպես էլ այսօր և միշտ հայ ընթերցողը նրա հետ զգում ու ապրում է այդ դառն իրողության հետևանքները:

Հայ նոր գրականության հիմնադիր, աշխարհաբարի անխոնջ ջատագով ու Գրապայքարի հաղթող Աբովյանի վեպը հայ նոր գրականության հիմնաքարն ու անձնագիրն է: Այն մշտատև դասագիրք է՝ հայրենապաշտության, լեզվասիրության, ժողովրդասիրության, բնապաշտության:

Խաչատուր Աբովյանը լուսավորության առաքյալն էր, որ հանուն իր ազգակիցների, հանուն ազատության՝ այրելով այրվեց իր հայրենիքի բախտով: ««Վերք Հայաստանի»-ն մեր զարթոնքի հոյակապ էպոսն է, անձնագրի կոփվր, մարտնչումը», իրավամբ նկատել է Ավետիք Իսահակյանը: Մեծագույն հայրենասերի տված դասերին մենք պետք է անշեղորեն հետևենք՝ սիրել, փայփայել մայրենի լեզուն՝ «տասը լեզու սովորեք, մեր լեզուն, մեր հավատը դայիմ պահեցեք», սիրենք մեզ ծնող ժողովրդին, անձնուրաց պայքարել հայրենիքի ազատության ու հավերժության համար:

Վեպի ենթավերնագիրը՝ «Ողբ հայրենասիրի», ամբողջությամբ բացահայտում է Աբովյանի անեզր հայրենասիրությունը: «Վերք Հայաստանի» վեպը երբեք չի կորցնելու իր արդիականությունը, քանի դեռ Հայաստան աշխարհի ազատության զահգերը չեն դողանջել «Դրախտավայր Հայաստանի» անկախ պետականության ու անխախտելի սահմանների վերջնական հաղթանակը:

Աբովյանը գերեզման չունի. նրա գերեզմանը բովանդակ Հայաստանի ամեն անկյունում է, ամեն ձերպում: Բայց հանճարեղ Չարենցը նրան տարել է «յառն Մասիս»՝ այնտեղ գտնելու հավերժական հանգիստ, այնտեղից նայելու իր Քանաքեռին ու Երևանին, այնտեղ բարձրացնելու հայի ազատության դրոշը:

Չարենցի «Դեպի յառն Մասիս» պոեմն է Աբովյանի ամենամեծ հուշարձանը:

«Խանդավառության, հերոսական գործերի մղում, և ճշմարտություն է, որ Ադասին իր կապուտակ ձիով՝ դոփելով, փայլատակելով ու զրնգալով, քառասմբակ անցել է ժողովրդի հոգու միջով»: ««Վերք Հայաստանին» գիրք չէ, դա հոգուց պոռթկած, սրտի խորքերից շղթայազերծված մրրկարշավ է, հրաբուխ: Ինչպես 1840-ին դարերով լրած Մասիսը պոռթկած կրակ ու բոց, և հեղեղեց, և շարժեց Հայոց աշխարհը, այնպես էլ նույն թվին՝ Աբովյանի մեծ սիրտը... հեղեղեց և կրակ ու բոց որոտաց, և շարժեց հայ ժողովրդի ներաշխարհը բովանդակ և կայծակի նման ճեղքեց ապագայի մութն ու մռայլը, ցույց տվեց հայ ժողովրդի փրկության ուղին՝ հայ ժողովրդի ազատագրման-անկախության ուղին՝ պահպանումն ու պաշտամունքը մայրենի քաղցր ու մեծասքանչ լեզվի:

Չարմանայի՛, անհունորեն զարմանալի հրաշք-երևույթ է «Վերք Հայաստանին»:

Քարաշատ Հայաստանը նրա վրա քար չդրեց, որովհետև նա չի մեռել. նա կմեռնի միայն հայ ժողովրդի հետ, իսկ հայ ժողովուրդը հավիտենապես անմահ է»:

Ավետիք Իսահակյան

Գնահատման չափանիշներ

X դասարան

1-ին հարց՝ ենթահարց 1. 3 միավոր,
ենթահարց 2. 1 միավոր,
ենթահարց 3. 1 միավոր:

2-րդ հարց՝ ենթահարց 1. 1 միավոր,
ենթահարց 2. 1,5 միավոր,
ենթահարց 3. 2 միավոր,
ենթահարց 4. 0,5 միավոր:

3-րդ հարց՝ ենթահարց 1. 0,5 միավոր,
ենթահարց 2. 0,5 միավոր,
ենթահարց 3. 3 միավոր,
ենթահարց 4. 1 միավոր:

4-րդ հարց՝ ենթահարց 1. 3 միավոր,
ենթահարց 2. 1 միավոր,
ենթահարց 3. 1 միավոր:

Հանրապետական հանձնաժողովի նախագահ՝ Ս. Աբազյան